


Directora Desiree Croes saca porta afor

Problema serio na Museo Numismatico den Weststraat

Te awe nan no a paga placa subsidia pa huur..



ORANJESTAD (AAN): Na Museo Numismatico un problema familiar awe ta haci cu e directora a ser suspendi y saca porta afor.

Te hasta polis a cay aden y a presenta despues cu tabata tin cambio di lock di porta door di tur dos partido.

Segun informacion, e fundador real di e museo a fayece y esaki a bira parce e problema mas grandi entre henter e famia cu ta encarga cu e fundacion tambe.

Desiree Croes kende ta e directora tabata e prome cu a cambia e locknan di e porta. E dia despues ta e otro grupo di famia tambe ta pone nan lock.

A base di un carta cu e stichting cu ta consisti di e

famia a manda pa Desiree Croes via nan abogado, nan a notifiké cu el a ser suspendi. E motibo exacto no ta conoci totalmente.

Di otro banda DIARIO a bay busca informacion y segun informe haya ta bisa cu gobierno ta subsidia e fundacion aki. Nan mester a paga un suma di 5 mil Florin pa luna pa huur e lugar den Weststraat. Esaki te awe no a sosode ningun biaha.

Na mas cu un ocasion esnan encarga cu maneho di e edificio tabata yama financien pa mira si e placa a drenta, però nan no a haya contesta positivo.

Pa colmo e mesun stichting tabata tin intencion di huur Huisje Wild tambe pa pone nan museo di Antigüedad

den Timbalstraat eyden.

Awor cu tur e problema aki, kizas esaki lo mester bay ser evalua mas profundo.

Parce cu tin un testamento cu a keda atras tambe den henter e problema despues di morto di un familiar.

Nos lo keda vigila henter e desaroyo di e problema aki pa haya e origen exacto di e problema pa cual motibo Desiree Croes, directora di Museo Numismatico awe a ser poni porta afor despues cu su mesun famia den e stichting a mande un carta via abogado.

Tin informacion cu mayoria den e famia kier bende Museo Numismatico aunke e prijs mes no ta conoci pa nos.